

# Norienes Kleuterskool

## Inligtingstuk



**Speel, leer en groei saam na 'n blink toekoms!**

**Werk en Wen**

**Dit is ons skool so mooi**

**Waarheen ons al die Norienes-maats nooi,**

**Waar jy self kan speel, baljaar, lag en werkies doen.**

**Werk en wen is wat Norienes - maats doen.**

*Liewe Pappa en Mamma*

*Lees asseblief hierdie inligtingstuk noukeurig deur aangesien dit belangrike inligting bevat.*

**Inhoudsopgawe:**

1. Inleiding – Verwelkoming
  
1. Toelatingsbeleid
  
2. Skoolure
  
3. Skoolgelde
  
4. Norienes Opvoedkundige Program
  
5. Uiteensetting van Program

## **1. Verwelkoming**

Geagte Ouers

Baie geluk met u keuse van Norienes Kleuterskool vir u kleuter. Hier by ons is dit vir ons van die grootste belang dat u kleuter gelukkig sal wees.

Die feit dat u, u kleuter aan ons personeel toevertrou, is vir ons van groot waarde. Ons verstaan die behoeftes van u kleuter en sal op sy/haar vlak met hom/haar werk en geleidelik deur die daarstelling van geskikte aktiwiteite en leergebeure op 'n spelende wyse hom/haar trappie vir trappie toerus vir die formele leersituasie en so ook hom/haar instaat stel om aan die kritiese uitkomst van sy/haar leefwêreld te kan voldoen.

Ons skool is so beplan en toegerus dat die buite-en binneterrein mekaar perfek aanvul, sodat elke kleuter optimaal kan meedoen aan speel en leer handelinge om kennis en vaardighede asook die nodige tegnieke te bemeester waarvoor hulle moet beskik.

Elke kleuter is 'n kosbare geskenk wat ons van God ontvang het. Daarom sien ons daarna uit om saam met u as ouer te werk aan julle kleuters se perseptuele, kognitiewe, normatiewe en affektiewe ontwikkeling, om sodoende saam met u te kan belê in u kind se toekoms.

Vriendelike groete

Mev. E. Ellis

Departementshoof: Pre-primêr

## **2. Toelatingsbeleid:**

Kleuter kan toegelaat word tot Norienes kleuterskool indien hy/sy kwalifiseer in terme van die onderstaande toelatingsbeleid.

1. Kleuters waarvan die moedertaal Afrikaans is, of bereid is om in Afrikaans onderrig te ontvang met Engels as tweede taal en waarvan die Christelike geloof sterk oorkom.
2. Die ouderdom van die kleuter is as volg: Die jaar waarin die kleuter 3 jaar word tot 6 jaar.
3. Skoolfooie is streng vooruitbetaalbaar oor 11 maande.
4. Skoolfooie is verpligtend en deur nie betaling, verbeur 'n kleuter sy/haar plek.
5. Een maand skriftelike kennis word vereis indien u kleuter die skool gaan verlaat.
6. Dissipline: Ouers is medeverantwoordelik vir kleuters se opvoeding en dissipline.

## **3. Skoolure:**

Ouers moet asseblief daarop let dat ons opvoedkundige program stiptelik om **7:30** 'n aanvang neem. Indien u kleuter dus laat by die skool aankom, veroorsaak dit vir hom/haar, sowel as vir die ander kleuters in die klas groot ontwrigting. Reël dus asseblief u sake so dat u kind reeds 7:45 gearriveer het. Kleuters sal wel vanaf 6:30 reeds ontvang word.

Ons program is eers om 12:30 afgehandel en daarom doen ons 'n vriendelike beroep op ons ouers om u kleuters eers 12:30 by die skool te kom afhaal. Moet asseblief nie tussen 12:00 en 12:30 pla by die hek nie, dit steur in storietyd wat die kleuters se konsentrasie belemmer. Indien daar 'n krisis is, skakel asseblief ons kantoor nr: **(011)– 660 7049** en tref vooraf die nodige reëlings, bv. Dokter- of tandartsafspraak. Die hek word gesluit tussen 7:45 en 12:30 vir u eie kleuter se veiligheid.

Voel asseblief welkom om my te spreek, of maak gebruik van die boodskapboekie vir kommunikasie as dit nie moontlik is om my persoonlik te sien nie.

## **4. Skoolgelde**

Die skoolgelde betaalbaar is as volg:

'n Registrasiefooie van R1430 is betaalbaar wanneer u, u kleuter inskryf. Skoolgelde is vooruitbetaalbaar met ander woorde, Januarie as die skool begin, betaal u vir Januarie. Skoolgelde is betaalbaar van Januarie tot November voor/op die 7de van elke maand.

Die tariewe is as volg: Voldag 06:30 – 17:30 R1430 x 11 maande skoolfonds + R900: R2330

Halfdag 6:30 – 12:45 stiptelik R1430 x 11 maande. Ons naskool ure begin stiptelik om 13:00.

**LET WEL TYE TYDENS VAKANSIES 07:00 TOT 17:30**

**Bankbesonderhede: Solid Basics Development, ABSA Tjekrekening, Rek no 409 069 1449, Tak kode 632005 – NB!! GEBRUIK REKENING NOMMER AS VERWYSING ASB. Neem asseblief kennis dat die skool sluit vir skoolvakansies maar 'n vakansieprogram word aangebied tydens elke skoolvakansie, behalwe Desembermaande.**

## **5. Opvoedkundige Program van ons skool**

### **Doelstelling met ons program en skool:**

Om 'n ryk prikkelende en stimulerende leefwêreld in totaliteit vir die kleuter te stig, wat hom/haar in staat stel om deur middel van effektiewe opvoeding en onderrigmetodes sy/haar navorsingsdrang sinvol te beveredig, wat sal lei tot die harmonieuse ontplooiing van sy/haar persoonlikheid in sy/haar weg na volwassenheid. So sal hulle aan die kritiese uitkomst kan voldoen.

### **Dagprogram:**

Ons dagprogram maak genoeg voorsiening vir goeie afwisseling tussen rustyd, roetinyd, kringtyd en verskillende hand-aktiwiteite tydens vryspel. Afwisseling van dag tot dag help om eentonigheid te voorkom. Met ons hoë standaard, aanbieding en beplanning poog ons personeel om altyd die dagprogram vars en sprankelend te hou.

#### **5.1 Vryspel**

Vryspel is van 7:00 tot 7:30. Hierdie deel van die program beteken dat die kleuters binne aan 'n verskeidenheid aktiwiteite kan deelneem onder toesig van die onderwyseresse. Hierdie aktiwiteite sluit onder andere in: Fantasiespel, blokke, sandspel, fietse, legkaart, en nog vele meer.

#### **5.2 Aankoms by klas**

Ons kom in die klas bymekaar om gesamentlik ons dag se verrigtinge te open en te begin.

#### **5.3 Teenwoordigheid en weerkaart**

Hier kry die personeel die geleentheid om elkeen van die kleuters individueel op sy/haar naam aan te spreek en so kontak te maak. Die gewyde opening sluit enkele gebede deur die kleuters in, asook die sing van gewyde liederen en 'n kort boodskap uit die Bybel. Die personeel kontroleer op die teenwoordigheidsregister wie almal teenwoordig is en ons kyk na die dag se weer. Nuuskringetjie word ook gehou – “Ons het 'n nuwe baba, ons het 'n ongeluk gemaak, ens”.

#### **5.4 Toiletroetine**

Dis 'n belangrike deel van die program waar die kleuters geleer word om selfstandig die toilet te gebruik en sindelikheid word bevorder.

#### **5.5 Gerigte aktiwiteite**

Hier kry ons te doen met ons temabespreking, versies, uitstappies, sang- en musiekaktiwiteite, bewegingspele, persepsie, wetenskap ens.

## 5.6 Leerinhoud

Elke week se leerinhoud sentreer rondom 'n tema waarvan die inhoud op 'n tafel uitgestal word. Die inhoud verskil by die verskillende ouderdomsgroepe en word moeiliker soos wat die kleuter ouer word. Die temas word uiteengesit volgens die bepalings van die "Caps – dokument".

U as ouer kan gerus artikels oor die tema van die week, van die huis af saam stuur om op die tematafel te plaas. Dit gee 'n gevoel van ek is belangrik, my ma sien my en my behoeftes raak, sy stel belang in dit wat ek doen! Ons taak is om die kleuter in sy/haar hele menswees gereed te kry vir die "Groot skool" en beslis nie om die take wat aan die laerskole opgedra is, oor te neem nie.

## 5.7 Kuns/skeppende aktiwiteite

Die doel van hierdie aktiwiteite is om aan die kleuter sekere vaardigheidstegnieke te leer, sodat hy/sy met die materiaal tot sy beskikking, die tegniek kan bemeester. U moet u dus nie blind staar teen die eindproduk nie, want soos wat sy/haar tegnieke verbeter en hy/sy leer om te waag sal die eindproduk ook verbeter. Dit is nie hoe dit lyk nie, maar hoe dit daar gekom het. Dit is baie belangrik om elke prentjie wat huis toe kom te bewonder en te waardeer!!!! Maak asseblief 'n ophef van sy/haar werk. Gee 'n spesiale plekkie op die yskas of teen 'n muur waar die prentjie uitgestal word. Onthou dit is kleuter gerig. Na afloop van ons tweeweklikse beplanning word die kuns – koeverte huis toe gestuur, stuur asseblief weer net die koeverte terug skool toe.

## 5.8 Bak – en – brou

Elke Donderdag doen ons bak en brou wat gewoonlik met die tema van die week verband hou. Die kleuter word geleer om met 'n mes te smeer, 'n resep te volg en om netjies en skoon met kos te werk. Bestanddele vanaf die huis word soms benodig.

## 5.9 Verversingstyd

Verversingstyd vind aan tafel plaas. Kleuters kry beurt om tafel te dek en tafelleiertjie te wees en uit te deel. 'n Rustige atmosfeer word geskep om rustig te eet. Tafelmaniere en gesonde eetgewoontes word bevorder.

**Eie verversings:** Gesonde kos bv. Vrugtesap of 'n vrug en growwe broodjies. Skyfies is toelaatbaar maar geen lekkers.

Voldag kleuters word voorsien van 'n ligte middagetete en 'n versnappering: 'n vrug/broodjie in die namiddag. Indien u kind allergies is moet die nodige voedsel deur die ouer verskaf word.

Woensdae en Vrydae is snoepie dag of 'n "verassing" in die kosblik dag.

## **5.10 Storietyd/Luistervaardigheid**

Storietyd is 'n baie belangrike deel van die dag. Nie net omdat kleuters baie lief vir stories is nie, maar die onskatbare waarde van taalontwikkeling, emosionele ontlading, luistervaardighede word aangeleer, en ouditiwe geheue word uitgebrei, ens. Elke kleuter behoort daagliks tuis 'n storie te hoor, en terug te vertel, dit is van onskatbare waarde vir die bevordering van taal en leesgevoel.

## **5.11 Verdaag**

Kleuters word elke dag, by die "speelhok" afgehaal. Kleuters kry die geleentheid om rustig te word. Sommige kleuters is poot-uit en gou-gou in droomland. Naskool kleuters rus vanaf 13:00 – 14:30. Moet asseblief nie gedurende hierdie tyd u kind kom afhaal as u nie vooraf reël nie.

## **5.12 Buitemuurse – aktiwiteite**

1. Wetenskap : Experi-maatjies
2. Ballet : KareNati
3. Dans : PDS Dance Stars
4. Wiskunde : Maths 4 Todds
5. Drama : Dramatix
6. Rugby : Rugga Kids / Rugby Stars
7. Gimnastiek : Impala Gimnastiekkklub
8. Rekenaars : Stimu-Zone
9. Pottebakkersklasse : Kidz Kraftz

Hierdie aktiwiteite is nie by die skoolgelde ingesluit nie, demonstrasielesse en inligting word in Januarie aangebied. Hierdie aktiwiteite word ook bekend gestel aan u as ouers tydens ons verpligte inligtingsaand in Januarie.

### **5.13 Siekte tydens skoolure**

- \* Indien 'n kleuter tydens skoolure beseer of siek word, sal u as ouer deur die onderwyseres in kennis gestel word.
- \* Siek leerders moet asseblief tuis versorg word.
- \* Die skool is nie ingerig om siek kleuters te huisves nie.
- \* Ouers mag nie siek kleuters skool toe stuur om hier opgepas te word nie!
- \* Dit is vir 'n siek kind baie sleg by die skool – hy/sy verlang na mamma en/of papa en het individuele aandag nodig.
- \* Indien 'n kleuter by ons beseer word, word dit aangeteken en die ouer word geskakel en ingelig. Elke ouer moet asseblief 'n vrywaringsvorm voltooi om die skool en sy personeel sodoende te vrywaar van eise in verband met beserings ens.
- \* Allergieë: Reël asseblief vir die geskikte medikasie.
- \* Medisyne: Moet aan die onderwyseres oorhandig word deur u persoonlik.
- \* Die medisyne word dan weer in die middag deur die ouer self ontvang
- \* Wanneer u kind kopluis het moet hy/sy ook tuis bly asseblief volgens die regulasie kragtens die Wet op Gesondheid van 1977.

### **5.14 Omsendbriewe en vorms**

Dit word in brieweboek (flipfile) gestuur. Lees asseblief alle briewe/nuusbriewe wat aan u gestuur word. Dit is vir ons van groot belang om ingeligte en tevrede ouers en kleuters te hê. Stuur asseblief die brieweboek geteken terug skool toe

Gelde kan elektronies of by ons kantoor betaal word.

### **5.15 Klere**

Kleuters moet asseblief geklee word in gemaklike speelklere wat maar mag vuil word, want met netjiese kerklere kan 'n ouer nie modderkoekies bak of boomklim nie. Merk asseblief alles baie duidelik, merk ook skoene en onderklere. Indien u kind per ongeluk verkeerde klere geneem het, stuur dit asseblief terug skool toe, sodat ons die regte eienaar kan soek.

### **5.16 Wat gebeur as ek verjaar?**

Dit is belangrik om by die skool te verjaar, dit laat my belangrik voel! Dit gaan 'n spesiale dag wees en ek is die “verjaardagkoning”. Reël asseblief vooraf met my juffrou vir 'n geskikte dag om 'n partytjie in die klas te hou. Moet asseblief nie ballonne en te veel lekkergoed stuur nie! Ons is klein en ons magies word gou-gou vol. Ballonne is gevaarlik! Dit kan in ons lugpypies glip!



### **5.17 Snoepie**

Snoepiegoedjies word elke Woensdag verkoop, ons noem dit Snoepiedag. U ontvang 'n snoepiekoevert waarop elke Woensdag aangeteken word. Dit is R10.00 per Woensdag en u kan dit vooruitbetaal.

### **5.18 Wat bring ek saam?**

2 x vloeibare handewas seep, 2 pakke snesies (180), 2 pakke “whipes” en 12 toiletrolle.

'n Ekstra stel klere wat gemerk is in my tassie, vir daardie onvoorsiene glipsies!

Miskien 'n opgevoude plastiëksakkie vir die natklere.

Dit is van die uiterste belang dat elke kleuter elke dag 'n duidelik gemerkte tas sal skool toe bring. Dit is belangrik omdat klere weggraak as daar nie 'n tas is om die klere in te bêre nie. Dit leer ook u kind om selfstandig te word deurdat hulle “verplig” word om hul eiendom op te pas.

Mamma moet asseblief elke middag in my tas kyk vir 'n briefie of verlore klere. Dit is belangrik dat mamma in my tas kyk of ek nie 'per ongeluk’ 'n speeding van die skool (wat baie oulik vir my was) ingepak het nie.

Sonroom (gemerk asseblief) moet elke dag saam gestuur word asook 'n sonhoed wat by die skool mag bly.

Voldag kleuters: 'n klein kussing en kombesie gemerk asseblief. Dit word Vrydae huis toe gestuur om gewas te word.

### **5.19 Wat bly by die huis?**

Speelgoed en lekkergoed! Asseblief dit veroorsaak erge gevegte. Juwele en deftige klere wat nie mag vuil word nie. Skoene in die somer.

### **5.20 Wat moet ek aantrek?**

Gemaklike speel klere vir klim en klouter en fietsry. Klere waarvoor mamma nie baie jammer is nie, omdat dit dalk vol verf kan word. Klere wat ek self kan aan- en uittrek, “dungarees” is pragtig, maar moeilik om uit te trek as die nood druk. Verkieslik nie skoene nie, dit kan weggraak en 'n mens spring en hardloop makliker met kaalvoetjies.

***Onthou: “Mud is fun – it washes off”.***

**Ons herwin en versamel die volgende.**

“Help asseblief ons Rommel trommel is leeg”

Eierdoppe (gewas as u kan)

Jogurt houertjies

Knope

Gebruikte rekenaarpapier

Tydskrifte

Koerante

Vuurhoutjieboksies

Foelie

Skoenbokse

Sigaretboksies

Leë toiletrolletjies

Geskenkpapier

Groentesakkies

Ou tennisballe

Afval material

Afval wol

Krukproppe

Appelbokse

Roomysstokkies

Polystyrene bakkies

Purity botteltjies

X-straal plate

“Shredded papier”

Kersfeeskaartjies

Kostuum juwele

Weermag klere en “boots”

Papierborde

Blinkers / glitter

Kant en valle rokkie vir fantasie

U boeke . storieboeke

Hoë hakskoene, handsakke en serpe